

四庫全書

集部

欽定四庫全書

椒邱文集卷二十五

明 何喬新 撰

詩

七言絕句

附集
句

福安書事

福安連歲被寇加以洪水為災室廬蕩然水後疫氣
大作死者什三四甚至家無噍類鄰里懼其相染也不

敢過門故死者往往暴露不葬嗚呼哀哉何吾民之不幸也予行部至縣延問父老慨嘆不已雖悉心圖之然才非張養浩未能有濟也因即所見漫成十絕用貽一二同志庶幾共圖救荒之策云

海門夜半吼長鯨怒捲閭閻入巨溟惟有清霜臺上檜
亭亭不改舊時青

市閭白晝舞天吳無限羣生化作魚弭節行臺增慨嘆
蕭條邑里似荒墟

兵後蕭然甑有塵更堪癘鬼困殘民
慚予不是張希孟也對斜陽淚滿巾

驅車曉度碧山隈拂拂腥風逆鼻來
怪得饑鶯飛舞下前村露靴卧汙萊

危檣巨舶晝縱橫海上時聞鼓角鳴
莫怪近來征稅少編氓漸入綠林兵

青裙少婦抱孤兒長跪車前淚滿頤
夫死銀坑生業盡日鋤野菜和糠炊

去年賑濟仰官儲今歲官儲半粒無捕得海鮮將換米
可憐孤淑遇強徒

兒釣青蛙母捕鰻溪邊風雨不勝寒歸來竈冷生柴濕
寂寞無言掩淚看

鴻雁嗷嗷可奈何桑田此日變滄波願持誠意回天意
却轉悲歌作笑歌

茅簷過午突無烟里正催租更索錢不遇使君親問訊
此身已分入黃泉

民有貧不聊生者欠糧七升不能納里正督之且索
私債民急欲自縊里正執以詣道予訊而憐之笞里
正使代納俟秋成取償焉民泣謝更生故錄其語云

山亭瑞香次宗源韻

翠袖珠翹吐異香不隨羣卉競春陽名園臺榭今餘幾
得似山亭晚更芳

福安行臺次景澄韻

軺車曉駕粵山陽苦雨蕭蕭去路長最是不堪怊悵處

平原桑柘盡凋傷

重過大凝寺次景澄韻

三年四度過禪家
兩見凋零兩見花
今日畫幡重駐此
綠陰彌望盡桑麻

初度有感時寓寧德行臺

五年初度客中過
不似今晨感最多
先壠在盱身在粵
蓼莪咏罷淚懸河

石牛驛次南谷韻

苦雨炎風促去程此心不為世間名願將幾滴天瓢水
一洗閩山萬壑清

訊鞠稍暇偶閱唐人王建宮詞愛其寓興深遠
頗得國風離騷之旨因擬作四章錄呈易庵兼

東南谷年兄

花貌宮娃老掖庭承恩元不在傾城披香殿上開春燕
閒看羣姬弄化生

憔悴無心對鏡臺燕釵象掃鎖塵埃昭陽自有身輕者

肯放羊車夜半來

纖眉如月鬢如蟬
金屋栖遲十二年
別院昭容新繫臂
而今已賜洗兒錢

碧梧淅淅送秋聲
坐倚銀牀百感生
誰向御溝題落葉
不知溝水最無情

汀州行臺次易庵韻

榕陰垂綠暗
閩溪蹀躞花
驄去欲迷
駐節行臺心
獨喜
幽林無復怪禽啼

玉華洞次易庵韻

白雲深處是仙臺
寶樹春深玉鶴開
蓬島未應能勝此
仙人何事不歸來

洞前琪樹倚雲栽
洞裏瑤華映雪開
一自飛軒遊碧落
月明空見鶴歸來

道傍李花為風雨所殘

縞袂珠襦白玉冠
含悽無語怯春寒
東風不為多情惜
無數殘鈿趁馬鞍

行部上杭道過三洲館見白花生枳棘中芳潔
可愛而不知其名問之村民曰文壇花也予哀
其託根非所賦詩唁之又推花意而答賦焉凡
得六首

雪彩冰姿傍棘叢更堪苦雨與斜風五侯亭館多閒地
何事淒涼向箇中

右唁花

素質生來異衆葩孤根不識五侯家年年雨露隨天分

肯向風前怨歲華

右代花答

麗館崇臺二月時
羣葩紅紫競
歲稔可憐寂寞荒山裏
空抱芳心吐向誰

右重唁花

不誇顏色不誇香
不共羣英競艷陽
造化栽培知有意
且隨本分過春光

右花重答

沁園臺榭五雲連
鈴索春來處處懸
何苦甘心蕭艾裏
炎風瘴雨有誰憐

右再唁花

碧桃紅杏炫春容
歲晚紛飛總是空
縱在主家鈴索裏
可能禁得五更風

右花再答

渭水秋風圖

剪得秦川半畝雲
晴窻鳳羽翠紛紛
狂飈莫苦相摧折

清廟簡韶待此君

行臺有花名剪春羅一夕盛開時浙寇入境予

與景澄督兵討之賊敗走因戲成詩一絕云

劍倚晴空殺氣高
鼙鼙膽破抱弓嗥
天公應欲行勛賞
故剪春羅製絳袍

坐客有談兵者縱橫無窮謾成一絕以警之

趙括談兵世鮮倫
長平一敗血成津
誰知感項安劉者
却是當時重厚人

過斜頭遇雨

肩輿薄暮過斜頭
風雨蕭蕭送旅愁
太息人家生計盡
柴扉不掩野麋遊

錄村氓語二

首

大兒前歲死銀坑
弱子而今又出征
但願使君平黠寇
老氓從此樂農耕

行營昨夜運糧回
今日還差送甲來
道路奔馳何日已
石田強半是蒿萊

過卧龍岡有感

卧看關河起戰埃，草廬數語見雄才。
于今未必無諸葛，誰肯三迴枉駕來。

銅臭紛紛位顯庸，豈知王佐卧隆中山林。
莫道無伊呂，水鑑何人似德公。

孝直竒謀世鮮雙，君侯共事每包荒。
忠勤亦有張樞密，却恨臺章詆李綱。

論者謂張浚忠勤似孔明，然孔明能容法孝直而浚不能容李綱，此其所

短也

題鰲溪圖

滿榻松陰滿院苔
書聲隱隱蕙帷開
雙橈誰鼓晴川艇
應是門生問字來

題屏間紅梅

曾餌仙人換骨丹
霞裳翠舞月華寒
暗香疎影終非俗
莫比桃花一樣看

錄襄鄧民言七首

一傲賢於十萬兵
西南赤子荷更生
雄詞誰似元夫子

重與磨崖頌聖明

襄陽行徧到南陽勞徠寧辭去路長
刁斗不驚雞犬靜
村居處處樂耕桑

總戎往歲駐荆襄黃口呱呱泣路傍
今日歡然騎竹馬
攔街歌舞迓都堂

白茅覆屋竹編籬斫得生柴給曉炊
婦子熙熙還感嘆
於今始得免流移

綠林兵散瘴烟清歸買山田自力耕
蕎麥收來村釀熟

家家歌吹頌皇明

荒山寒谷停車處
慰問丁寧出至情
白叟黃童俱感泣
不圖今日覩昇平

玉節光臨漢水湄
殘民喜極更成悲
峴山何用銘遺愛
千載斯人口是碑

寒食郊行書所見

破帽飄飄白髮垂
日斜醉飽意施施
歸家尚作驕人態
不記墻間乞食時

偶成

冰鑑當年重德公
近來何事大冬烘
人間未必無王佐
却認長蛇是卧龍

題梅竹卷

四首

梨雲漠漠楚天低
縞袂相逢思欲迷
斗轉參橫寒漏永
夢迴惟聽翠禽啼

姑射仙人冰雪姿
珠冠瓊珮下瑤池
湘江帝子元同調
翠袖相依歲晚時

鐵榦瓊英玉作魂，託根不傍五侯門。
歲寒惟有疎篁在，共保清貞水石村。

霜華簌簌暗香浮，萬顆明珠夜不收。
幾度披圖吟興遠，恍如水部在揚州。

次吳原明韻

故人寄我錦綉兒，要識淇園烟雨姿。
却笑河豚誇絕品，此君真味有誰知。

憶返臺竹偶成

汲水當年總憲時
脩脩半畝雪霜枝
別來久斷平安信
勁節清風又屬誰

題菊

霜葩露葉冷香浮
別是人家一種秋
歲晏羣芳搖落盡
脩脩翠篠伴清幽

題松為樊都運賦

虬枝夭矯翠參天
雨榦霜皮老更堅
椽桷年來收拾盡
豈知梁棟在山巔

晉陽途次所見作六

首

采采槐牙不滿筐
婦姑踞地且同嘗
祇愁四月槐牙老
從此貧家又絕糧

阿母前行兒後追
追不及哭聲悲
祇知各自求生路
肯復回頭一顧兒

首着花開松粉飄
貧家生計轉蕭條
平原處處無年麥
山鳥休呼婆餅焦

二八了鬟泣路隅
逢人但道乞為奴
豈知富室都懸罄

誰有餘糧養侍姝

縣令傳言禁食人誰憐百姓甌生塵情知醉客非糟蔬
且飽饑腸度此春

榆皮細擣晝丁丁野菜同烝半熟生幼稚呱呱羸老泣
不知何日見秋成

平陸所見

被苦藉草倚頽垣父啖兒屍祖啖孫一段民風堪入畫
寫生只欠鄭監門

錄村嫗言

芮城有村嫗坐豆畦間呼兒而哭問之則曰有女年
十五換得豌豆三斗種之冀以療饑今天旱而豆槁
矣徒使母子離散終不免餓死也

賣却嬌兒換豆歸豈知種豆盡為箕空令骨肉東西散
不得杯羹療母饑

過故相第作二首

門掩西風晝不開
蚍蜉滿壁粉墻頽
庭前乳犬休驚吠

無復懷金暮夜來

偃月堂空複道深
薔薇零落棘成林
槎槎喜鵲歸何處
不到人家送好音

白羊石

白石離離似白羊
蘄然頭角徧沙場
獨慚未學初平術
一任閒眠對夕陽

播州夜聞子規有感

命墮殊方一羽輕
更憐十口住都城
播江此夜聞啼鵲

淚濕寒衾夢不成

事竣還京將發渝城偶成口號

去歲乘輅出帝畿
茲晨整珮覲彤闈
擔頭訟牒兼詩草
不帶川中一物歸

山居觀物偶成作四首

風暖空庭草色青
門如市處不曾生
閒中玩物窺天意
始悟春風也世情

雙燕應懷舊主人
巡簷緝壘往來頻
却嗟老圃春光暮

黃蝶紛飛過別鄰

風和日麗百花香坐看遊蜂釀蜜忙擾擾營營空自苦
蜜成端的是誰嘗

靈鳥噉噉集林端浪惹羣兒競射彈何似黃鸝逞嬌舌
遊人聽罷有餘歡

題泥金畫梅

此花元是玉為容金粉何勞點染工識得和羹風味別
始知來自益珠宮

瓊姿不肯染緇塵，別是西湖一種春。畫裏底須論色相，金丸熟處見天真。

別同年王繡衣集句四首

我去君留可奈何，李竹所青雲莫道故人多。劉文房片帆今

夜又何處，施鈞獨影翩翩逐逝波。甘允從

頭上花枝照酒卮，千家詩鳳城依約更相期。陳益稷九重正

爾思梁棟，子昂可向江南久別離。吳全節

楊柳青青江水平，劉夢得別時相顧酒如傾。岑參何當共剪

西窓燭

李義山

更與慙慙唱渭城

劉夢得

日暖飛花近鬢絲

虞集

相留一醉本無期

戴幼公

明年此日

知何處

韋應物

立在清朝白玉墀

薩天錫

草
陸
廣

椒邱文集卷二十五

欽定四庫全書

集部

椒邱文集卷二十九
六至

詳校官庶吉士臣汪彥博

中書臣劉源溥覆勘

總校官進士臣朱鈐

校對官編修臣許兆椿

謄錄監生臣饒錫光

欽定四庫全書

椒邱文集卷二十六

明 何喬新 撰

哀辭附誄

徐孺人哀辭

孺人黃氏竹樓先生之女贈翰林編修金谿徐君之配
今翰林侍講時庸之母也以子貴封孺人年七十有二
以疾卒於家子與時庸同薦於鄉其歸葬也不獲助其

沐柳故為虞殞之詞遺之俾輓者秉鐸歌之以慰孺人之靈云

繫有熊之裔胄兮產茲窈窕之好逑既媿媿其鮮雙兮又惜嫵而好修撫芳年而結悅兮得佳匹於南州淑慎厥躬兮曾何有於暇豫曰老吾奉兮曰幼吾撫握荃而枕蕙兮矧帶衡而佩矩婦職是共兮敢少愆乎厥度天佑淑懿兮有岐嶷之佳兒匪徒勤乎三遷兮嚮簪珥以教之子克祇厥慈訓兮肆翥翥乎鳳池皇貺恩而寵嘉

兮命書煥其陸離服匪無綺縠兮胡獨衣此縞紵也食
豈無臕臠兮顧乃甘此蔬茹也夫豈自約以肥厥家兮
範諸婦以儉素也春秋不奄兮老冉冉而逮之乘剛馳
而遐逝兮奄一去而莫追虛室間其無人兮幽窵窈以
茫茫想其駕翠輶而從王母兮醉瑤池之霞觴抑亦度
弱流之瀉漉兮與姑射而徜徉露雲四塞兮素驥傍徨
寒飈慘慄兮畫翼翩其飛揚悵淑質之永殂兮奉懿範
之孔彰嚮佳城而敷誄兮感予涕之浪浪

玉田耕隱李先生哀辭

先生諱陞字汝登玉田耕隱其別號也少孤母孺人居貧守節躬教之先生感母之教刻苦自勵發為詞翰皆精絕可喜以養母不求仕延名師教諸子俾無墜先業已而其子廷韶廷美聯舉於鄉而廷美登進士第累官刑部員外郎廷儀亦以禮經魁鄉選先生以子恩封刑部主事成化壬辰母孺人歿先生哀痛過禮得疾竟不起嗚呼哀哉始子官刑部愛廷美清慎而文友之及佐

憲於閩獲與先生接其貌溫溫其言恂恂其行渾然端
且厚予乃知廷美之賢蓋有自也閩固多賢士然明允
和厚不以愛憎為毀譽者予知先生而已嗚呼先生不
可作矣長厚之風不復見矣則子哀悼之情其能自己
乎是用哀之以辭以寫子情焉辭曰

少微夕隕兮露雲沈以冥冥金颺蕭瑟兮挾怒潮以悲
鳴嗟若先生兮奄乘鷲而上征淑哉若人兮鍾三山之
粹靈明秀好修兮指先哲以作程被蓉裳之芳潔兮懷

椒醕以為食膏梁匪所願兮等文繡於締綌清詞熒熒
兮燦綠水之芙蓉推操稜稜兮挺寒巖之孤松懷瑾握
瑜兮羌獨偃蹇乎林垞隆忠養於所恃兮亦何心乎浮
榮築室玉田兮聊耕讀以娛情嗟若先生兮孝且慈胄
膺多賢兮天實錫之或登名於蘭省兮或端笏於彤墀
譬羣鳳之翩翩兮覽德輝而來儀后皇嘉惠兮爰貶恩
而疏封光寵烏奕兮益履謙而執冲彼燕山之竇老兮
蓋異世而同風嗟若先生兮胡不少留駕蒼螭而遐逝

兮挹赤松而同遊抑將渡弱流之滌滌兮採玉芝於崑
丘鄉失著龜兮吉與凶其孰諏後生悵悵兮莫識先民
之風猷嗟若先生兮竟何為天不可問兮命不可知九
原茫茫兮莫子起之生芻一束兮感子涕之漣漣

嘉興呂文懿公哀辭

有姜氏之鼻祖兮肇受呂以建邦昆仍去厥邑以南遷
兮爰有家於江東委厥祉於夫子兮際明時而奮庸繫
夫子承茲世美兮又重之以好修濟詩書之雋永兮服

周孔之芳猷日勉焉若弗及兮追駿步而遐遊鄉大夫
之賓賢兮夫子裒然為舉首叫閭闔而陳昌言兮眎賈
董孰知其先後彼欽永與元白兮固將汗流而却走肆
登秩於翰苑兮日密邇乎清光既紬書於石渠兮亦視
草於玉堂抒經邦之素蘊兮贊明堂之宏議彼九州紛
總總兮固已陰受其賜何嚴霜之遽降兮諼草習其先
誥承凶問而號慟兮淚雨下而霑膺詔諭勉至再三兮
夫子控辭而弗起出承明而南邁兮抵嘉禾而戾止爰

匍匐以將事兮，惶恤厥躬之摧毀。嗟窀穸之未就兮，奄
遘茲大故。豈昊天之不憖遺兮，抑修短之有數。哀訃達
於九重兮，聖衷盡其孔傷。卹典之加等兮，煒存沒之有
光。哀與榮之兼備兮，在夫子其奚憾。惟哲人之既萎兮，
斯羣情之所感。慟多士以隕涕兮，悲梁壤而山傾。爰述
行而陳誄兮，嚮西風而抒情。亂曰：黝雲鬱兮含淒石瀨，
滴兮增悲。悵夫子兮安在，超寥廓兮騎箕層城。千仞兮
雲路險巖，三神邈以遠兮。弱流淼瀾，吁嗟夫子兮盍歸。

乎來

歐陽隱君哀辭

隱君諱顓字允乾姓歐陽氏其先與文忠公同出於唐吉州刺史而別居於太和之蜀江者也隱君少有異操不樂從事於俗或勸之仕則曰吾兄若吾弟咸仕於時吾焉用仕為矧吾親老矣忍為升斗之祿遠違膝下耶於是隱君不出以養親為己職砥行植節鄉邦稱焉鄰有鬪訟者隱君為直之歲歉不足於食者隱君發粟以

周之蓋有王彥方連舜賓之遺風焉年七十有三考終
於家家宰王先生既銘其墓後數年其子溥來京復求
予為之辭予辭不獲命乃為楚歌以招之曰

繫君子之仕隱兮維道是由摯旦由光兮孰知其劣與
優嗟若先生兮羌獨偃蹇乎山丘託喬林之幽蔭兮濯
碧澗之澄流攀商顏之逸駕兮襲嚴瀨之風猷匪絕世
以為高兮固吾志之是求維吾兄若吾弟兮聯翩奮乎
明時親髮既種種兮嗟予舍膝下其焉之蜀江之涘兮

厥壤孔阜仰吾事兮有老俯吾育兮有幼善薰其鄉兮
信孚其友彼鄰競之方紛紛兮就吾廬而聽直一言若持
衡兮羣囂嘆焉以息凶歲之薦饑兮或不厭乎糠粒發
廩粟以飽之兮焚通券而靡責既綏里閭以仁兮又申
導之以義是亦為政兮奚必違親而求仕或容與於南
碕兮或植杖乎西疇松柏蔚其葭茂兮稭稌芄芄而有
秋眎世外之功名兮邈太空之雲浮鸚鵡習其先鳴兮
老冉冉而將至溘埃風而遐征兮儼電流而颺逝石泉

咽而含悲兮巖霏黯以帶愴山川宛其如昨兮悵靈爽
之安往哀老成之不可作兮心紆軫而不舒抽予思而
為誄兮忱鬱邑乎增歔許曰魂乎歸徠兮魂無西東西
顛沉碣兮東溟泱泱魂乎歸來兮魂無南北雕題獷戾
兮玄朔悶塞魂兮乎歸來兮魂無上下重陰幽晦兮太
空惴慌蜀江之上兮有田有廬左右雜列兮有琴有書
山可樵兮溪可戲歸徠逍遙兮四極不可以居

參政郭公哀辭

公諱循字邦禮其先本尚父汾陽王之裔避難南遷遂
占籍於吉公少舉進士擢刑部主事嘗上書宣廟陳工
部營繕之弊召對便殿改司空屬以憂去位服闋仍為
刑部尋陞郎中奉詔讞畿郡獄多平反遂拜廣東參政
時海寇猖獗命大帥討之以公贊理戎政暨寇平公之
策畫居多將入覲以疾卒時年五十有七而已予哀公
年不躋百齡位不登三事而功業不大見於世也為著
哀辭以永其傳云

繫汾陽之裔胄兮簪黻嬋媿其相仍季葉汨其南征兮
肇即宅乎廬陵公既稟茲異質兮又承圭茅之洪族探
洙泗之聖髓兮踵濂洛之芳躅勉汲汲乎踐修兮指前
哲以作則仁義藹其內融兮文章燦爛而外揚乘青雲
而高馳兮鳴和鸞之鏘鏘闔闔洞以四闕兮威鳳噉乎
朝陽皇曰子嘉兮汝作朕鵷鳩明刑以弼五教兮合槩
矧於咎繇撫爰書而屢歎兮惟生是求嗟共工氏之蠹
弊兮曾莫達乎聖聰爰閉閣而草疏兮叩黼宸而獻忠

天聽甚邇兮曰予揆汝忠直俾佐司空兮冀羣靈之不
革何彼蒼之降酷兮習纍然而衰服終喪而入覲兮步
亨衢而騁力服忠貞以圖報兮矢九死其靡忒奉明詔
以讞獄兮勤五聽而察冤揚日月之盛明兮俾宏燭乎
覆盆聲隱隱而日隆兮肆簡注乎皇心乘鷲車而載馳
兮參大政乎頌之南何海隅之羣醜兮紛弄兵乎潢池
長蛇舐舐而當道兮走平陸之妖螭奮天戈而致討兮
剽殄滅之無遺妖氛廓以清兮渤澥恬其不波駕言覲

帝都兮馳四牡之駢駢
召沉疴之頓劇兮奄長逝而莫
子追公年非歿兮位亦不可謂卑
惟用不究其才兮感
多士而獻款昔先公與君聯舉於鄉
兮交誼亶其夙敦
肆童孺之不肖兮嘗獲接乎誨言
悵九原之不可作兮
曾莫薦乎蘋蘩氣滄蕩而填膺兮
聊寓哀乎斯文

故處士王君敷苦哀辭

三山有隱君子曰王君敷
苦前翰林修撰中美之從子
而今秋官郎中彥弼之季父也
少習舉子業慨然有志

於用世既而以疾廢遂捨科舉之學益務博覽無所不
窺發為詩歌新麗可喜尤工行草書以故士大夫皆重
之其事親也孝以誠其事兄也恭以順其處里閭也術
術以和蓋其為行尤可重也彥弼少孤君教勵甚至故
彥弼學底於成登進士第以顯於朝廷皆君之教也今
彥弼得告歸省則君之墓木已拱矣與子言不勝其哀
且求哀輓之辭子謂君葬已久無事乎輓也為作楚歌
二章以遺之彥弼歸拜銅盤之瑩俾未冠者歌之以侑

莫觴亦庶幾少紓其哀矣乎其詞曰

有美一人兮山之中金玉其音兮冰雪其容濯石泉兮
自潔歌紫芝兮倚雲松習厭世兮遐峰挾天風兮浮游
太空左王喬兮右韓衆出入恍惚兮起鴻濛仙馭寥寥
兮吾將奚從瞻望徒勞兮憂心冲冲

歸焉銅盤兮山之岡白楊櫛椽兮有封若堂夜猿啾啾
兮含怨石瀨滴滴兮帶愴牲孔碩兮酒孔旨掃石苔兮
薦芳仙之遊兮渺何許歌楚些兮命巫陽歸來歸來兮

慰茲孝誠毋為遲留兮使我心傷

處士胡君允恭哀辭

遼陽處士胡君允恭今監察御史以道之伯父也以道少失怙恃處士鞠而長之不啻若己出以道亦孝養備至若己所繇出迨既知學處士朝夕督勵以進其業凡裘葛之費脯腊腴腴之需一不以累以道俾得專志於學以道忤然克邁進修思顯其身以為伯父光寵不數年遂領鄉書登進士為名憲臣蓋處士之教也方將以

其祿養而處士遽以疾歿於家訃聞以道號慟幾絕欲
解官持服顧不敢以己之私而干國家之典心常歉然
言及之輒泣下乃求知處士者銘其墓又屬余為辭以
寫其哀昔者蘇明允之葬也其子文忠公軾既請歐陽
公銘之又請曾子固為之哀辭曰銘將納之壙中辭將
刻之塚上也以道求哀辭於余亦文忠公之意歟乃為
楚歌二闕以遺之俾凡胡氏子孫歲時上塚歌之以侑
奠觴庶乎處士之靈臨舊鄉而下睨乘鶴以來歸亦足

少慰侍御君之心而紓其哀焉其辭曰

秋風起兮黝雲幽幽江颺啼雨兮夜啾啾悵美人兮渺
何許斧屋閣兮海之陬嗟若人兮世孰與儔志芳潔兮
審其好修考槃空谷兮惟志之求鍾鼎圭茅兮邈若雲
浮厭茲空濁兮駕言遐遊溯剛飈兮度弱流左招赤松
兮右挹丹邱蓬嶠高寒兮胡為淹留盍歸來兮享此脬

脯

秋露隕兮羣芳萎翁茸欣植兮蕙枯蘭衰懷美人兮不

見感余涕兮交頤嗟仲氏蚤逝兮渺遺孤兮乳乳疇依
字且誨兮俾克有知摩九霄兮振羽儀簪筆螭陞兮金
豸輝輝匪伯氏兮胡能臻茲樹欲靜兮風撓之祿方養
兮何遽違鴨綠蕩蕩兮靡有息時含悲茹痛兮終天為
期酌寒泉兮侑以瓊麇盍歸來兮慰此孝思

吳母魏孺人哀辭

予讀詩二南未嘗不慨然而歎曰天下未易化者莫女
婦若也而周之盛時自公侯之妃大夫之夫人至江漢

之女汝墳之婦莫不有貞信之行肅雍之德焉非先王
神化有以陰中其心能爾哉三代以降女教既廢雖士
大夫之室家以賢淑著稱者亦鮮矣况其下者乎及考
南平吳母魏孺人之行乃知閨壺之賢可以媲美二南
者未嘗無之第世人不盡知耳孺人生於名門作嬪君
子其幽閒之德則關雎所詠也其締綌之工則葛覃所
稱也歲時助祭敬供籩豆則采蘋之意也享有多福母
有多子則采芣苢斯所頌也嗚呼賢哉其眎二南所歌

者有以異乎無以異也孺人既歿其子鄉貢進士珙屬
予為哀悼之辭予謂三代以前女婦之賢者既播之聲
詩被之箚絃矣三代而下幸有賢如孺人者其可使之
泯泯無聞耶故為辭以哀之其辭曰

靈菱旖旎兮繁霜悴之慈竹蕭疎兮迎驚颭以離披吁
嗟夫人兮奄棄世其如遺夫人稟茲姱質兮又申之以
懿德佩湘蘭以自芳兮垂寶璐以為飾陳圖史以自鑑
兮願依公父氏之遺則甫二八而結帨兮得嘉匹於名

宗令德令儀兮窈窕而肅容春秋將事兮蘋藻是共勤
婦職以成締綌兮有葛覃之遺風舅姑交慶兮嬪御孔
宜天佑淑懿兮福履綏之蘭玉紛其充庭兮信振振其
螽斯嗟薤露之易晞兮悵壑舟之遽移壽年未耄兮奄
一疾而莫追文筆之峯兮佳城鬱其嗟峨女婦失厥攸
師兮感淚雨以滂沱評曰緱嶺邈兮鶴已飛秦臺寂兮
鳳不歸將同王母兮宴瑤池抑駕翠輶兮從麻姑而娛
嬉雲容慘兮風聲悲宿草青兮秋露淒錦機塵兮走蚋

城帳音容兮杳莫知有生必死兮孰能追之淑行孔昭
兮百世其誰命巫陽兮陳些詞夫人有知兮盍歸乎來

監察御史伍君哀辭

嗚呼吾忍哭吾體駟耶體駟有洪裕之度有剛介之操
有剴煩治劇之材不惟吾知之凡士大夫蓋莫不知也
然位不滿其德用不盡其材年未臻下壽而死天耶人
耶誰實為之耶嗚呼哀哉初體駟按部於閩聞上杭表
民聚羣不逞構亂單騎抵盜所且檄三司以兵來會躬

入其巢穴諭以禍福盜感悅降者日數千獨其渠魁負
固不服體馴督勵將士進討之破其砦馘其魁而散其
黨三司欲上其功體馴固止之故事莫上聞而賞亦竟
弗及體馴之在上抗也晝夜起居恒在炎風苦雨中絲
是得疾代還寢劇竟至不起嗚呼哀哉人有恒言曰賢
者必貴仁者必壽若吾體馴非所謂賢且仁者耶然位
止此年止此天道冥冥蓋不可究也吾與體馴相知最
深嘗謂他日建丕績於國家垂休名於竹帛者必吾體

馴也曾謂體馴止於斯乎宜吾咨嗟痛悼不能自己也
故托之楚聲以寫吾之哀焉其辭曰

停雲靄其在望兮思美人而不見九原杳以冥冥兮感
予涕其若霰惟美人之好修兮瑩其玉潔而珠明漱六
藝之芳潤兮掇百氏之精英甫壯歲而領鄉書兮肆策
名於天庭金豸戩戩兮白簡凜其飛霜駕星輶以四馳
兮風聲邁乎范張夫何閩山之嶽嶽兮小醜肆其狂攘
鳴張而蟾怒兮孰舉手以遏其狂美人促駕以駿奔兮

誓以蕩平為己責先之文告兮匪徒逞志乎斬馘衝霧
雨之溟濛兮犯炎埃之歊赭豈不恤吾躬兮念王事之
孔棘妖氛豁以曠朗兮身抱疴而日瘁和扁莫吾療兮
溘先朝露而長逝年雖匪夭兮胡不耄期位雖匪卑兮
胡不丞疑叩巫咸而奠余告兮獨咨嗟而涕洟嗟世之
貪凌兮或黃髮而兒齒包羞以苟生兮不如遄死嗟世
之回遁兮或厚祿而榮名芳譽不立兮雖顯寵其何稱
年與壽若有歎兮名凜凜有耿持此以較彼兮果孰短

而孰長余知美人賢且仁兮力莫足以振之嚮西風而
延佇兮謾含哀以噉詞

劉母安人翁氏哀辭

嗚呼風俗之弊久矣自為士者不能終其節況於女子
乎有如南平劉母翁安人者蓋為愧也安人年廿有九
喪所天其子璋方在襁抱不能必其立也安人居窮守
節勤瘁困阨而不變其志卒就其子以克紹其家閭里
嗟異之有司高其行欲請諸朝以旌其閭安人謝曰此

女婦當然耳何足上聞乃止嗚呼安人之節行如此視士之守一善而已不克終者為何如也安人孀居廿一年而卒卒若干年而璋以進士擢地官主事又三年天子以璋克舉其職推恩其父母乃有追贈之命焉璋懼安人之節不傳於世屬余為哀辭嗟夫安人守制育孤而不欲上聞豈願以節行稱於後世哉哀辭不作可也雖然風俗既弊若凱風之不安其室者紛如也有若安人之德而使之無聞其何以翼世教激弊俗則哀辭不

可不作也昔陶嬰蚤寡作黃鵠之歌以自誓予謂安人
之行無愧於嬰故託物引類為辭以哀之其辭曰

黃鵠翩翩兮金衣而菊裳朝遊太液兮比翼而翔暮宿
鄧林兮和鳴鏘鏘毓茲五采雛兮實肅肅而蹌蹌驚飈
振撼兮危巢委地傷哉雄鵠兮羌中道而長逝哀哀孤
雌兮躅躅悲鳴徘徊顧影兮不如無生豈無睢鳩兮在
彼河渚亦有鴻鴈兮載飛載下匪我好速兮寧棲居而
獨處懷彼故雄兮雲路杳漫欲殺身以相從兮固非余

之所難念黃口之疇依兮揆諸義猶未安風霜酸苦兮
余心甘之梁藻不充兮敢云余飢山石可泐兮此志不
移羲馭不留兮奄追於崦嵫羽化而登仙兮從故雄以
娛戲離今羽翼兮粲繽紛其有章蓬形廷之鴻鴻兮侶
阿閣之鸞凰追昔顧復兮清淚縱橫已焉哉白楊慘兮
宿草青骨雖朽兮有餘馨氣漸盡兮凜其猶生鵠羽豈
不肅肅兮死有餘腥嗟此黃鵠兮擅百世之休聲

太保王文端公哀辭

太保王文端公西昌之世家也登永樂甲申進士入翰
苑為侍從以選勸講春宮遷禮部侍郎遂登冢宰位師
傅歷官五十餘年文章道德卓然名世天下之士頌其
文而思見其人既見其人靡不服深遠去疵吝下至里
巷孺婦亦能道其姓號其薨也士大夫識與不識莫不
咨嗟慟悼嗚呼若公者豈非古之所謂盛德君子耶喬
新與公為通家子又非他人之痛悼者比故哀之以辭
云

鬱余懷而紆軫兮汨余淚之浪浪余心曷其孔哀兮悼
哲人之云亡自古孰不有死兮羌睠睠而懷茲念夫子
之盛德兮固今世之所稀夫子稟茲矯質兮又申之以
問學匪秋蘭其靡佩兮匪芳杜其焉服尋沫泗之墜緒
兮蹠濂洛之遺則道德藹其中弭兮英華煜其外敷察
風雲而高騫兮宏經邦之訐謨紬史牒於東觀兮典綸
綉於北門雄篇鉅冊軼歐蘇而駕班揚兮追姚姒之瀨
渾彼崔蔡之瑣瑣兮固縮慙而橫奔或輔德乎春官兮

或辨章乎台階屹明堂之柱石兮豈當世之著龜志欲
合榘矱於伊周兮陋姚宋而不為秉端直以相吾君兮
履繩墨而不頗太山喬岳雖不見其運動兮顧澤物之
孔多功成而身退兮將投老乎山之阿朝發軔於潞渚
兮夕弭棹乎文江讓後人於丕時兮尋舊隱乎西昌追
綠野之遺風兮續耆英之嘉會保厥美以自樂兮日容
與乎物外歲忽忽其易徂兮老冉冉而將至嘉傳說之
託列宿兮騎箕尾而偕逝皇覽訃而增傷兮嘆昊天之

不慙遺多士掩涕以相弔兮悲秦山之忽頽爰考行於
太史兮定所謚於太常修名耿其永延兮吾知夫子之
不亡歎先公之典銓衡兮與夫子而聯事顧童騃亦何
知兮屢進拜乎庭庑聞鶴馭之上征兮怛痛焉余衷腸
嗟音容之不復覩兮念誨言之不可忘曩追感於謝傳
兮過西州而徘徊軾矐矐於文忠兮亦搢解以寓哀人
情同於懷舊兮豈今昔而異心非盛德之君子兮曷為
使余歔歔而不可禁夜曼曼而不旦兮寒颼淒其四來

鵜鳩鳴於木杪兮似助余之悲哀孽蘄若以薦芳兮慙
夫子之弗歆托巫陽以儼些兮又慙夫子弗我顧臨聊
抽毫而抒思兮寫煩督於中心

陳君廷泰哀辭

廷泰姓陳氏今秋官郎中廷儀之兄也其先世家光之
固始唐季避亂入閩遂為閩之連江人君為人和易莊
重好學能詩其字畫亦遒勁可愛其事父母以孝稱撫
諸弟友愛尤篤廷儀仕於朝君數寓書戒以居官行己

之道故廷儀為時名執法賢聲藹然是雖父母之教抑亦其兄有助焉耳天順壬午十有二月廿有六日不幸殞於非命廷儀聞訃哭之慟語及之輒潛然嗚呼以廷儀之哀悼如此則君之賢可知已今廷儀謝事南歸將葬君於廉湖山之原屬余辭以寫其哀故為辭以招之俾執紼者歌以相輓庶幾化者聞之將不悼其不幸於地下矣其辭曰

閩之山兮蒼蒼閩之水兮泱泱悵美人兮長遠惜子懷

兮增傷嗟夫君兮好修承華胄兮中州寒芙蓉兮攬芳
莖日徜徉兮安流孝爾親兮夔夔友爾弟兮怡怡樂天
倫兮自得肯銜外兮賈知羌魯閣兮彼穹弗祐良兮殲
免禍機發兮叵測倏隕生兮狡童天高高兮莫顯地茫
茫兮莫訴跖之壽兮顏之天子不知兮曷故椿庭寂兮
含悽鵠原慘兮增悲抱冤憤兮誰語魂惆恍兮知不知
幸承芳兮有子桂枝紛兮旖旎亶仁者兮有後綿休慶
兮無已采溪毛兮薦芳丹旒纈兮飛揚些歌下招兮遣

巫陽君不來兮我淚浪浪佳城鬱鬱兮卜云允臧願乘
桂車兮結蕙纒凌風歸來兮廉湖之岡

雙峯劉先生哀辭

雙峯劉先生求素由進士累官刑部副郎以守法不阿
忤權貴權貴中以危禍衆惴惴謂且不測賴先帝仁聖
卒全宥之謫戍遼海今天子嗣統歸凡被謫者詔下而
先生已沒嗚呼可哀也已予與先生有同鄉之好故為
文以哀之云

悲若人之邁患兮塞侘傺以隕生問蒼天弗吾諭兮感
予淚之霑膺先生幼而志學兮指先哲以作則匪寶璐
其弗珮兮匪瓊簾其焉食抱遺經究終始兮爰窮幽而
探蹟學成而致諸用兮恒斷斷乎所執明經以輔教兮
期踵武於前修秉邦憲而不貳兮肯吐剛而茹柔帶鉤
矩而珮衡兮謂無施而不可何世途之險巖兮忽獨邁
茲奇禍彼讒人之罔極兮肆蔓辭以詆欺曠日當空兮
露雲黯黯而蔽之清廟之宏璧兮僉誓以為石也芳洲

之嘉橘兮反誣以枳棘也仰玄穹而自慙兮官穆穆其
無言咎繇不可作兮孰察先生之煩冤伏園扉以累月
兮歛愁頰而日憂幸皇鑒之孔明兮薄示竄於荒陬出
國門以東邁兮指醫閭而戾止鴨綠滌溼以無垠兮瞻
故鄉其萬里義和高馳兮忽已迫於崦嵫乘化以歸盡
兮與斯世乎長辭賈生之投湘兮終召見於宣室劉向
遭讒以下獄兮晚歲亦登乎顯秩先生一斤不復兮抱
幽懷而莫伸襲長夜之悠悠兮不及見乎陽春先民有

言兮自古孰不有死愴夫之無良兮雖生其猶鬼先生
守正而斃兮名凜凜有耿光一世之短兮百世之長苟
修名以永延兮雖九死亦何傷臨西風而歌些兮聊以
慰子於窅茫

封監察御史魏公誄

成化丙午秋九月廿有四日封監察御史餘姚魏公卒
於家得年八十有一喬新與公之子今江西布政使瀚
同年進士也公卒時喬新宦轍南北不及賦述行相緋

之辭迺為之誅蓋雖不獲載之素於庶幾附諸家譜其
辭曰

於惟魏公畢公之緒佐周戡殷肇起茅土厄於嬴秦北
南散處嗣世綿綿惟卿惟輔繫公之生實承先祉爰在
垂髫含和率禮藝苑舒翹詞林振鞞賢良之舉乘時奮
起華問聿彰益敦素履銓曹遴材佐邑於瀧惟時蠻獠
虔劉我疆元戎震怒欲殲以兵公曰不可懷遠以德撫
以恩信而擴不格兇奔獸擾式宣皇澤椎髻卉裳誠感

心革願歸皇化附我版籍壯哉濬邑在國南圻徵發旁
午殘民日疲公往丞之敏且有為不競不練恩威隨施
逋租匿役歸首如期飛蝗遠避大田如茨遺秉滯穗利
及鰥嫠公亦有子休聞夙著振翼天衢蜚英憲府公曰
歸哉返我初服酌我寒泉藝我芳菊良朋泣止陟降追
逐惟帝貶恩即命於家豸冠岌岌繡服孔華恩寵雖隆
退然靡夸謙德之光里閭歎嗟壽胡不多八旬而止嗟
今之人其誰不死戩穀如公令聞曷已餘慶所延簪裳

濟濟矧惟方伯殿茲南紀天之報公庶其在此豐山之
原松柏蒼蒼生雖有止其存者長我懷若人名在形亡

敬薦哀誄以焯幽光

椒邱文集卷二十六

欽定四庫全書

椒邱文集卷二十七

明 何喬新 撰

祭文

祭沈方伯文

嗚呼沈公遽止斯耶慨念疇昔使我傷嗟始佐夏官克
亮厥采條嬰奇禍遠竄遼海鼙鼙之穴冰雪之場荏苒
十年艱阻備嘗人為公憂公順以處視險若夷居嘗暇

豫皇有恩命起佐汴藩敷政優優小大稱賢桂嶺之阨
炎烟鬱勃公往旬宣不遑自恤靈霧內作赫赭外烝天
不慙遺遽隕其生嗚呼哀哉公之鴻材宜躋臺閣數也
多奇位止方岳公之仁厚宜享耄期命也不淑奄逝莫
追堂有慈親霜華被鬢倚門而望今見歸櫬庭有令子
歧嶷而才昔焉戲綵今服絰衰嗚呼沈公歆此芳耐壽
雖不多名則不朽悠悠畫筵暫駐江濱臨棺一慟侑以
此文嗚呼哀哉尚享

祭程襄毅公文

嗚呼維昔忠壯著勛於梁儲休委祉祚膺以昌繁公之
生實鍾先慶毅然其剛翼乎其敬京闈擢秀遂登賢科
敷歷中外勞績實多簪筆黃門忠言謇謇出贊大藩惠
澤流行獫狁孔熾邊鋒屢驚秉節出鎮屹如長城入佐
秋官明慎庶獄隱隱沈寃靡幽不燭烏嚙狂獯擾我南
疆董師致討羣醜于襄帝曰爾來作朕圻父往鎮南邦
式總機務迺放教條迺戢奸驕畿甸肅然罔或謹囂連

章乞歸晚乃得謝從容詩酒追蹤洛社厭世何早騎箕
太空當宁嗟悼卹典優隆追贈有誥易名有謚生榮歿
哀在今罕比矧有賢子侍講經筵清文雅望與公後先
周之休父宋之文簡以及公身奕世丕顯某等素辱公
愛承訓良多聞公之訃怛焉驚嗟縻祿於茲無由執紼
搢辭寓哀往酌公室嗚呼哀哉尚享

祭陳亞卿文

惟公系出太丘世以儒名傳序迨公益振休聲年方垂

髻沈酣經史發為詞章博瞻雄偉京闈論秀黃甲蜚英
爰擢都官式典邦刑單辭是清兩造斯理俾我聖皇從
欲以治迺將皇命錄囚南邦開釋沉寃頌聲洋洋迺陟
藩垣于彼東土敷政優優民歌且舞烏髯弗率越蹈我
疆命公建節往斧其吭叛者威之服者綏之椎髻卉裳
投戈畢來皇曰汝歸往我司寇小大之獄庶罔或謬彼
造物者胡嗇公年溘焉遐逝曾莫少延朝失著龜民失
父母矧予同志失茲良友吟溪之澣新塋載開莫助執

紼曷慰我哀陳此嘉穀侑以芳醕公其來格鑒我哀悰
嗚呼哀哉尚享

祭左時翊文

嗚呼時翊遽止於茲耶博洽之學雄麗之辭道勁之字
俊逸之詩世寧復得見之耶其任也內佐冢宰外典藩
司身雖貴而不驕年雖高而不衰謂公終當躋崇秩而
享期頤孰謂奄一疾而莫追耶世之人不歉於人則謗
且悻不獲乎天則怨且疑公之所歷有窮有達有險有

夷而公處之若一但見坦坦而怡未見戚戚而悲非樂
天知命其孰能如斯耶嗚呼麻姑之谷盱水之湄吾知
公駕玄鸞駮白螭與泰伯南雲相從而娛戲彼一杯之
土南山之陞文光炯炯固將燭霄漢而陸離某等或通
家之夙好或交誼之相知聞公之訃固當匍匐而執紼
顧山川悠邈弗克駕素驥而送靈輶何以寫哀奠此卮
酒而侑以此詞嗚呼哀哉尚享

祭劉侍郎文

嗚呼惟公風標俊偉冰襟磊落才邁王揚學宗源洛其於文也浩乎蘇王之雄渾其於書也淵乎馬鄭之辨博發於詩詞也有若金聲玉振之鏗鏘見於字畫也不啻春蚓秋蛇之間錯故其論秀詞場也摠藻思之春容其簪筆螭頭也效忠言之審諤其進貳憲卿也休聞揚於羣公其出佐藩服也嘉績冠於列岳胡一疾之弗痊奄九原之不作是何志之壯而氣之漓才之豐而命之薄耶然而年垂五十不可謂夭也官躋三品不可謂小也

承家有子慶綿綿也制行無慚名皦皦也則公之云歿
亦復何憾乎所可悼者朝失良臣民失父母矧於子輩
亦失益友哀訃忽傳乃心孔疚葬莫執紼斂莫撫柩臨
風灑淚酌此卮酒嗚呼哀哉尚享

祭黃公愈宣文

首二

嗚呼公吾之世姁也吾嫂公妹吾婦公孫情親義篤匪
伊異人公之生平吾能言之標格峻整襟度融怡富而
能約崇而自卑羸餒者賴公而舉火仳離者賴公而有

依弱而良者恃公得以自立狂而狡者畏公有所不為
所施雖不過一鄰亦足以為世家大族之師今公之歿
也羸餒者將為溝中之瘠仳離者將為中谷之摧狂狡
孰為之呵叱善良孰為之扶持孰知德義之可尚孰知
巧險之為非薄俗方興而未艾數十年後安知不為羶
獵與梟鴟安得起公於九原以為鄉邦之羽儀嗚呼死
生之理吾非不知然於公之歿不能已於言者非獨媿
舊存亡之情蓋悼老成之凋謝傷風俗之淳漓所以洒

淚而酌此一卮也嗚呼哀哉尚享

惟公祖考世以善稱公克踐修益著令名門第雖崇謙
恭自克貲產雖裕勤儉惟德歟歲發粟惠於鄉邦義聲
上聞寵命聿彰諭以綸音錫以章服奚啻束帛賁於空
谷有子翼翼有孫英英花封作宰璧水明經年登八袞
康寧樂凱胡不耄期遽此乎止惟我與公世為婚姻情
義之篤不讓朱陳我歸林下謝絕塵事所冀與公徜徉
山水天書此好乃忍奪公山霞水月誰復相從今公將

葬我適有疾不哭於堂莫助執紼言雖有情情則難忘
楫詞叙訣以侑奠觴嗚呼哀哉

祭大理卿王公文

嗚呼公之平生吾能言之其學之博也淵乎江漢之滄
瀦其文之雄也浩乎波濤之碣砢其剛介之操則松貞
而柏勁其純懿之行則玉良而金精其典邦計也經畫
之材與韓劉而並駕其綰郡符也循良之政與霸遂而
齊名其位方伯也隱然東藩之重鎮其臨邊疆也屹乎

北鄙之長城至其為卿於大理也直欲追踪乎臯陶之
種德蘇公之敬獄非徒若漢之于張讞獄之得其情而
已嗚呼公材既優公行尤懿推其蘊足以秉國之鈞擣
其文可以掌帝之制惟天生公殆必有意然而年不滿
五旬位不登三事將生民之無祿耶抑宏材絕識固造
物者之所忌也嗚呼公乎其胸中之炯炯者其能埋藏
湮塞於朽壤之中乎必將粲為列星流為風霆或為山
河以壯國家或為麟鳳以昭文明豈若世之庸庸者有

時漸盡而飄零也哉嗚呼自公云亡朝野嗟咨矧於吾
儕素辱公知昔升公堂笑語怡怡今升公堂素慢淒淒
臨棺一奠而侑以此辭者蓋為天下惜非獨感今悼昔
而寫吾之私也尚享

祭丘文莊公文

嗚呼唐有曲江世稱賢相公生其鄉名德相望宋有名
臣曰崔菊坡公賢與齊而文則過公之於文奮泓演溢
孰可擬之東坡父子公之所學淳澁瀾瀾孰可擬之原

父弟兄兩秉史筆褒貶惟公叙述高簡有史漢風三持
文衡痛叱浮薄軋茁之辭變為灑靈乃典國學教嚴道
尊時之公輔多出其門乃登內閣贊元輔德海內士民
陰被其澤公在相位不見所為所可見者民物熙熙天
不慙遺遽奪司馬士林相弔或慟於野我昔弱冠已聞
公名甲戌春試遂獲同升公不我愚每相磨礪謂宜勉
進毋墮所志公有著述每俾評之且約後死則為銘之
我之南歸握手相別臨別之言遽成永訣誼當往弔謂

老病何弗躬弗親負公實多陳此蕪詞以侑罇俎公知我心寧不我顧嗚呼哀哉尚享

祭憲副游公文

嗚呼游公遽止於斯耶位不登丞弼年不躋期頤謂公祿壽之未艾胡為乎捨我而永歸耶嗚呼公之儀刑不可得而見公之平生尚可想像而推其志節之剛毅挺挺乎孤松之偃蹇其學問之宏博浩浩乎長江之渺瀰其襟度之和易溫溫乎春陽之煦物其文章之純質鑿

鑿乎菽粟之療饑其有志於道蓋將尋紫陽之轍涉瀛
洛之涯使得及門於孔氏雖未敢謂其升堂而入室然
於道之大本其殆庶幾乎嗚呼公之存也學者仰之如
山斗察友信之如著龜儉夫憚公而縮惡善類賴公而
扶持今其亡也學者失所景仰察友無所稽疑儉夫欣
欣肆其惡而莫之沮善類惴惴或見義而不敢為是以
識與不識聞公之喪莫不悵然痛悼而嗟咨況予於公
朋友之分情誼之篤宜乎淚疾下而漣洒也嗚呼西山

之麓劍江之嶂公之體魄將復於彼公之神氣則無不
之臨棺一奠侑以此詞蓋一為斯文痛一為友誼悲嗚
呼游公知與不知尚享

祭伯父稼軒先生文

嗚呼昔我先公兄弟三人粵自蚤歲其艱其屯由艱而
康由屯而泰孰庇孰庥先澤攸賴先公出仕為時富歐
伯父遠隱擬跡巢由昊天不弔先公奄棄筑筑諸派伯
父是倚白首歸然九族著龜一疾奄逝曾莫子追念昔

如京拜公於堂諄諄明訓佩服敢忘茲馬來歸墓木已
拱追思音容曷勝感慟宿草青青白露載零酹此卮酒
清淚霑纓嗚呼哀哉尚享

祭原司馬文

嗚呼哀哉公生於世六十有一宣力四方奮庸帝室有
猷有為有勞有烈紀於竹帛蓋焯然其不滅也彭蠡之
域龜蒙之邦肅乎秋霜霑乎春陽乃贊國計乃振臺綱
懋績益著令聞不忘至於顛懷流徙輯寧荆襄則其事

為尤難而其功為愈光初公受命而南也或沮之於內
或撓之於外徼功者慮發其奸戕民者懼罹其罪惟公
毅然泰然罔忿罔懟如羊祜之建議伐吳如裴度之決
策平蔡乃協羣策乃誦善謀或攬轡武關之險或擊楫
漢川之流攀援乎猿猱之窟出入乎虺豺之隙爰告爰
慰以綏以柔授之田宅戢其戈矛曾不踰時而愁歎之
聲轉為歌謳榛莽之區變為田疇彼馘齊民以獻捷視
赤子如敵讐聞公成功徒悔恨而含羞帝念其功遂加

寵錫都憲尚書崇秩薦陟公宜壽考臻於大耋秉國之
鈞以熙庶績胡茲邁疾奄逝莫追豈公之厭世溘埃風
而遐舉抑民之無祿而昊天之不憖遺當宁震悼羣公
增悲而荆襄士女如喪所親謂公歿而疇依嗚呼哀哉
然公年踰六袞位列六卿有傳國史有謚太常焯德有
碑虞殯有章在公可以無憾是謂雖死而不亡嗚呼昔
公之來也士女喜極而獻教今公之歸也士女慟極而
涕洟况於某等奉令承序又所嚮慕而瞻依感今悼昔

曷勝清淚之漣沛寓哀一莫非徒哭吾之私而已蓋以
傷哲人之萎嗚呼哀哉尚享

祭憲副李世望文

嗚呼李惟著姓代襲簪纓公復秀出載振家聲學專麟
經窮幽探蹟發為詞章精華奕奕擢秀南省策名南宮
遂登上第休聞日隆銓曹掄材爰擢柱史鰥廢以安寬
滯用理出僉臺事于貴于蜀審審直聲士論攸屬相彼
巧宦一歲屢遷公守一官踰十八年晚陟憲副典兵西

鄙邊塵不飛虎旅循軌蠢茲醜類掠我土毛元戎出征
誓殄腥臊公董偏師直探虎穴屢馘克渠載殲餘孽天
不憖遺星隕將營大勛未集遽殞其生靈輜南還暫泊
湘浦俾我友朋益增淒楚徽功倖勝祿厚位高公歿王
事誰錄其勞有酒在卮有肴在俎思公不見洒淚如雨
嗚呼哀哉尚享

禱雨文

嗚呼惟子與神同泣茲邦子所職者政教神所司者雨

暘念雨澤之不時由政教之或覈固知咎過之在于非
明靈而曷赴愬意者某等誠敬不足以格神與慈惠不
足以保民與羣生怨咨恬莫之恤庶獄寃濫壅莫之伸
與典兵者徒事朘削之政牧民者未施撫字之仁與庶
官之廉慎者未能舉而諂諛或親與巨室之豪橫者未
能誅而哀籲不聞與咎實在予民則何罪胡明神之爽
罰俾民遘此大戾沃以腴者化為燥剛秀且實者轉為
枯瘁興言及此潛焉出涕然神享民之祀猶子食民之

食也民窮無告殆將匱神之祀非徒為子之憂責也爰
叩靈壇載伸微悃惟爾有神鑒予之誠哀民之困玄雲
倏興靈雨載零轉呻吟為歡聲變黃楸為榮茂歲事有
成邦賦用登則子知免乎鑄銷而神亦永享乎嘗烝矣
謹告

禱城隍祈晴文

嗚呼淫雨為孽落水壅以沸也眀畝淪沒秋成不可冀
也室廬漂蕩老弱無所庇也百姓何辜邁此大戾也某

等泣事茲土歲時享其祭也百姓嗷嗷豈惟官之憂責亦將乏神之祀也雨暘水旱神實司之非官所能制也躬禱靈宇覲神恤民之匱也神其降庥驅屏羣陰俾陽光昭以晰也羣潦歸壑舄鹵其藝也棟宇載葺民獲奠居之制也四野熙熙恬以泰也孰尸厥躬惟神之惠也擊鮮薦芳報祀無替也謹告

山西禱雨文

迺者自冬徂春雨雪弗降三農告病庶類焦然雩禱雖

勤靈旣未應雲將合而忽散雨欲墜而復止意者喬新
等事神之敬未至與恤民之心未誠與兵已困而征戍
愈勞與民已窮而聚斂愈急與沉寃未雪而無辜困於
狴犴與巨蠹未除而赤子厄於豺虎與賑貸雖勤而實
惠未加於民與祈禱雖切而誠意未盡於已與是皆吾
曹之愆而小民何罪焉茲者春已暮矣民已瘁矣原田
日就蕪矣生意日就槁矣少者壯者適彼樂土矣老且
羸者轉於溝瀆矣神於吾民何慙然無情耶夫修缺政

以保民者吏之職也沛甘雨以濟旱者神之責也風雨
不時麥菽不藝豈惟吾曹之罪哉神亦不得辭其責焉
爰詣靈祠載陳微悃神其有知賜我嘉澤慰我疲氓俾
駢剛赤緹沾而足焉萎苗瘁孽優而渥焉則喬新等少
道其咎而神亦有攸享矣謹告

禱中鎮文

三晉比歲暵旱嘉穀不登兵民流亡餓莩載路皇帝西
顧惻然哀烝黎之無弔爰命喬新來拯疲氓而公私匱

乏罔有攸措矧春氣已動雨澤未濡大懼未克有年無
以上副聖心下慰民望惟神作鎮并州享茲典祀興雲
雨致財用神之職也爰詣靈祠用伸懇禱神其默贊鴻
造大庇吾民俾甘雨時降百穀用成流逋來歸寇攘屏
迹物無疵癘人用恬康則喬新獲免於戾而神亦永有
攸享矣謹告

禱禹廟文

惟王疏鑿龍門拯茲墊溺俾我烝民克享粒食河流溶

溶嘉穀芄芄萬世攸賴繫王之功惟茲三晉實王故國
王念遺民拯凶弔溺胡茲兩載飢饉荐臻粒食孔艱迺
至食人王聖且仁我民父母忍使蚩蚩墮茲罪罟下車
而泣昔嘗聞之民羸且亟寧不憫之王靈在天誕作霖
雨膏我麥苗爰及稷黍喬新將命西來齋祓以祈王神
如在諒不我遺佑我殘民驅彼蝥賊梁山洛水敢忘王
德謹告

禱汾陰后土祠文

惟神厚德載物克配彼天立我烝民厥功懋焉汾陰之
祠肇自漢氏雩禋禳祈迨茲千禩行祠翼翼遍於晉封
剗牲薦醴罔敢不豐胡茲三載旱魃為虐癘鬼逞妖人
困疔瘡殘民惴惴曷愬曷依神聽甚邇寧不我哀喬新
祇奉明命憫茲窮毒陳詞以禱敢徵神福玄雲滃興沛
然甘澍沃我菽麥爰及秔稌驅彼癘鬼迸諸遐方俾我
遺黎式恬以康神佑我民錫茲繁祉我民報祀曷具有
已尚享

平陽禱雨文

山西之境荐罹旱灾兵民轉徙異鄉委屍溝壑者不知
幾千萬人矣喬新受命賑濟來蒞茲邦所望五氣順布
羣黎安生而自春以來雨澤罕敷疫癘大作亡者未葬
而存者無樂生之心逋者未歸而居者有遠徙之志惟
神德澤崇深世享禋祀視斯民危急而不救何與謂民
之頑悍宜降以殃耶則民已盈其罰也謂官之貪殘獲
罪於天耶則不宜遷怒於民也謂喬新無憂國憂民之

誠故漠然無應耶則此心之誠可以質諸鬼神也敢願
明神悔過敷佑下民沛甘霖以沃焦土驅妖癘以蘇疲
民俾生意離離人心熙熙生者有養逋者以歸是則神
之惠也謹告

再禱雨文

昔關中大旱張養浩禱於華岳甘雨如注禾黍自生今
三晉之旱不減關中神之靈應無異華岳喬新祇率吏
民齋沐虔禱矣雲將合而忽開雨將墜而復止豈今之

請禱者非養浩其人與喬新雖無養浩濟世經邦之材然素存養浩忠君愛民之志而神漠然不答何耶伏望少鑒愚誠賜以甘澍轉歉為穰變沴為祥俾愁者以喜病者以安逋逃來歸寇盜潛藏則喬新少逭其責而神之靈應益彰彰矣謹告

三禱雨文

山川出雲雨及天下神之職也國家命祀春祈秋報為民福也惟茲三晉荐罹凶屯臻茲極也亢陽為虐繼以

嚴霜靡康食也噉噉遺民徬徨四顧將安適也迨茲三
春霖雨不降田龜坼也玄雲方合忽剗剗也簷溜將鳴
忽聞寂也嗟孰為之繫風伯也哀我筑獨啜其泣也雩
縈禳祈心孔劇也惟神有靈胡默默也尚鑒愚忱沛膏
澤也鞭雷叱風畎澮溢也俾我百穀秀且實也俾我四
民忭且懌也豐年穰穰繫神德也我民報祀矢無斁也
玄酒嘉牲醴且醕也幽明一理誠則格也洋洋如在毋
我弗也謹告

謝雨文

惟茲三春雨澤罕敷嗟我民兵呻吟載途爰率庶官齋
沐請禱以祈甘澍以沃枯槁惟神畀稔靈貺孔昭雨我
大田以滋我苗勺者以萌瘁者以榮杭稔菽麥庶幾用
成清酒潔牲以答神惠尚錫洪禧俾民康乂民既康乂
祝事是承神亦萬年式昭厥靈尚享

平陽祭龍文

旱魃為祟嘉穀將焦徧禱羣神未獲甘雨惟神變化不

測以興雲降雨為職者爰準古法作神之象齋戒以禱
焉神其誕昭靈貺瀉天瓢以沃焦土宣嘉澤以滌炎氛
則官民受賜多矣謹告

禱龍湫文

清冷之淵惟神之宮藏雲蓄雨有感斯通神飛於天雲
行雨施或潛於淵山澤明媚翼翼靈雨在山之巔吏民
承祀罔敢後先惟茲晉陽亢旱已極大田如頽靡有菽
麥雨暘旱澇實神尸之民死幾盡神胡不哀膚寸之雲

三日之雨神苟祐民厥施斯溥雷以為鼓電以為旗千里之內甘雨淋漓俾我平臯凡凡積黍昇我疲民嘻嘻笑語豐年穰穰敢忘神庥吹笙考鼓以薦脍脯謹告

椒邱文集卷二十七

欽定四庫全書

椒邱文集卷二十八

明 何喬新 撰

廟碑

廣昌縣重修廟學碑

皇帝嗣統改元之三年夏四月同知建昌府事麻城蕭侯允恭行部至廣昌爰詣學宮祇謁先聖先師顧宗楸摧朽圖繪黜昧慨然太息謂廣昌名邑耆俊多出焉

而廟學不修殆非我國家崇聖道育俊材之意吾為郡
佐與有責焉敢不以修飭為己任乃告太守三山謝公
仲仁用圖改作議既克合侯首捐俸金四百八十銖為
倡於是縣令莆陽葉君茂高丞晉陽李君拳暨學之師
生縣之義民祇若侯意或輸之財或助之役奔走奉承
以後為羞乃僦良匠市美材斲石為礎埏埴為甃煉蜃
為灰筮日奏功始事於大成殿黼坐朱几廟貌孔嚴旁
及兩廡拓而大之自羣弟子以及從祀諸儒圖像惟肖

前為正門列以畫戟外惟三門上應靈臺又作先賢祠
以祀鄉之先正至於齋舍庖廩之屬欹側者正之侈剝
者修之丹雘漫漶者飾之侯往來涖縣躬自督勸衆驩
趨之不煩執扑經始於是歲夏六月越明年戊子春三
月始考成焉殿廡靚深門闔宏麗多士聚觀以為他邑
所未有也侯帥令佐師儒舍菜於新宮告成事焉教諭
桐廬邵君忠訓導英山段君備湖南王君渙暨學之諸
生謂侯嘉惠此邦聿新廟學不可無辭以敬休聞相與

伐石置廡下而屬喬新書之喬新竊惟魯僖公作頹宮
史克頌焉吳仲庶新潭學王臨川歌之今蕭侯修學養
士之勤殆無異於魯公潭守所建立而聲歌不作非闕
典歟迺具書其成績於碑而系之以詩以繼頹宮潭學
之聲以昭示於來世侯字某以儒發身佐郡有威惠其
善政可繼者甚多以非廟學所係故不書其詩曰

盱水之曲奕奕新宮孰經孰營蕭侯之功於惟蕭侯民
之父母蘇枯齟強惠澤孔厚華幡彭彭戾於我邦念茲

庫陋顧瞻徬徨迺迺圖迺戒工徒迺卜迺諏爰茲暨
塗有伉惟門有翬惟殿丹楹藻稅罔讐藝憲我材孔良
我役惟時閱歲乃成匪亟匪遲新宮告成祀事孔明毛
衽斯醜黍稷惟馨侯升講堂衿佩濟濟或誦或絃亦文
亦史侯曰勗哉敬明迺德厥德靡修我心有感諸生拜
手侯訓惟休勉焉祇服敢遺侯羞麗牲有碑方趺圓首
侯之嘉聞百世不朽

建昌府重脩城隍廟碑

天下郡邑通得祀者惟城隍之神為然蓋築土為城鑿土為隍凡以為民之衛焉高城浚隍固風氣扞寇攘必有司之者察民淑慝而禍福之非妙萬物而神者與建昌城隍盱江誌謂其神乃漢潁陰侯灌嬰考之於史侯起布衣佐高皇定天下垓下之戰躡項羽東城而誅之遂渡江平吳定豫章諸郡凡大江之西皆侯提戈斬級所立功處生為元功歿為明神其理必有然者則司此城隍而廟食無窮者非侯其誰哉廟舊在郡之西北宋

紹定四年回祿煽孽郡人聶衛公子述始遷於城南通
會門內太平寺之故基元至正壬辰為羣寇所燬國朝
洪武十年知府王偁復建自堂徂門罔不畢備永樂二
年知府潘榮仲因其舊而修之迨今八十餘年棟楹橐
稅漸以腐折瓴甍丹堊日滋剝泐成化二年春郡守三
山謝侯仲仁謂廟宇傾陟不足以妥靈將事爰詔羣僚
下暨有衆相與捐金楮市木石鳩工徒撤而新之易腐
折為堅良葺剝泐為端潔若堂若廡以及三門凡為屋

二十間崇廣有宜文質中度左右司則仍其舊而加圻
填焉又搏土以肖神像琢石以為神座別創雲崖道院
俾本廟道士居之肇事於是歲夏四月至冬十二月乃
訖功焉侯剗羊豕帥寮屬告成於神闔境民庶聚觀讚
頌凡旱澇之變癘疫之興必祈焉報焉禱焉禳焉將事
益安靈貺斯勞物不疵癘歲屢豐登侯迺具廟之本末
遣耆民胡以榮屬予紀之予惟守土之職神人具依侯
自下車以來勤心庶政民既太和又飭神宇用安其靈

所謂惠於神人罔怨罔恫其諸豈弟君子者與迺作迎
享送神之詩遺之使并列於麗牲之碑歲時薦獻工祝
歌之以侑牲醴焉是役也贊其成者同知麻城蕭侯允
恭通判某推官某董其役者耆民某也其詩曰

神之來兮冷然以風絳旂旖旎兮駐斯宮睠威靈兮有
赫敷佑我民兮無窮牲膾兮酒馨鼓坎坎兮瑤瑟和鳴
神之所享兮在寅清我之將事兮在齋明明神既享兮
遲遲風馬雲車兮候何之姑山之顛兮盱水之湄儼神

馭兮娛嬉神不我顧兮我心悲家有雞豚兮野有杭稌
神惠我民兮俾蕃以庶驅癘鬼兮錫我純嘏春祈兮秋
報歲復歲兮敢忘神祐

東平王廟碑

廣昌之東園有祠曰東平王者宋咸淳中縣令朱汝賢
所立以祀唐忠臣張睢陽也按史王諱巡舉進士累官
真源令祿山之亂起兵討賊與賊將令狐潮尹子奇等
大小四百餘戰屢挫賊鋒後以孤城援絕力不敵以身

死之當是時逆胡起河朔蹂躪河華兵禍蔓延幾遍天下而王以區區睢陽扼其衝賊死咋終不敢越而南江淮之間晏然不識兵革者王之功也王之將死也西向再拜曰臣生無以報陛下死當為厲鬼以殺賊道家者流遂謂王受命上帝為瘟部帥察民善惡而賞罰焉其說窈冥蓋不可信然江淮之民慕王之忠烈且信道流之說故所在立廟水旱癘疫必禱焉其應如響東園之祠其一也永樂甲申廟圯於水正統庚申邑民始修復

之時先公為刑部侍郎記之甚詳歲久滋散天順八年冬十一月予從兄本堅弟喬福暨耆民吳大成居士揭仲雍大覺寺僧道霖等始合衆力而新之中為正殿後為寢室前為飲福之亭越明年夏六月廟成簷楹翬騫金碧絢麗柱板嚴整劍佩歲蕤耆稚聳觀以為有廟以來未覩茲盛道霖因子弟喬年求紀其成績夫王之忠烈無以贊為矣論者或謂王生鄧州死節睢陽其平生足跡未嘗履江南廟而祀之恐非先王制祀之意是不

然宇宙間屈伸變化不可測度者神也神之所以然者
氣也得其氣之剛大靈著者則為偉人發為忠義之業
炳然巍然不幸而死其精爽耿耿者不為異物漸盡復
為明神無所不之焄蒿悽愴隨所在而著見焉若王是
已廟食於茲夫何疑哉初王著神南土號封累加其曰
東平威烈昭濟顯慶靈佑王者宋景定元年十一月所
封也乃作歌遺之使邦人歌以祀王庶幾颺游來格降
福於民焉其歌曰

桂醕湛兮瑤觴蕭鼓鈞兮中庭靈連睭兮未來渺予思
兮睢之陽靈之來兮旗纛繽紛駕赤虬兮驂蒼麟霽雲
先驅兮殿以萬春歆我烝嘗兮穆且欣嗟天寶兮多盤
胡騎闕兮闕河昏長蛇在闕兮龍在野悵孰掃兮妖氛
靈哀憤兮援戈起鸞鳥號兮射妖豕北風競兮西日蒼
涼力既竭兮繼之以死身雖死兮精爽不亡陟降帝廷
兮乘陰陽察民善惡兮下殃祥龍岡之下兮盱之澣松
筠蕭慘兮綠陰承宇朝出遊兮暮來歸越千歲兮毋遠

茲土屏蠹賊兮驅癘鬼錫我百福兮壽且祉靈之降福
兮不那我民報祀兮終古無已

漳州重建道原堂碑

漳州治城之西北有臺屹然曰臨漳實據溪山之勝宋
紹熙庚戌紫陽朱夫子守是邦登茲臺而愛之欲築讀
書之室不果寶慶乙酉郡守危積始倣白鹿洞規築龍
江書院於臺之下成夫子之志也淳佑丙午郡守方來
復於書院之東偏構堂三楹肖夫子之像于其中配以

高弟北溪陳安卿每歲春秋率庶僚暨邦之羣彥祀焉而顏其堂曰道原蓋取夫子與北溪授受之語也其後邦人復以勉齋黃直卿侑食於堂蓋勉齋亦閩人且嘗講道夫子之門者也迨宋社既屋書院燬於兵遺址歸浮屠氏惟堂巋然故處歷歲既久屢圮屢葺然規制隘陋杲棟欹摧有識者憫焉成化四年春正月福建按察司僉事臨江周君守謨行部至漳祇謁遺像周覽慨然顧謂知府英山王文同知舒城胡珉推官南城江白曰

昔之思召伯者不忍拔其所爰之棠思萊公者不忍傷其所植之柏茲堂實朱子之明靈攸棲非植物比也傾圮若是是固為政者之過予司憲諸君守臣也弗亟圖之安所諉其責皆應曰諾相與捐俸以圖新之於是僦良匠斬美材礪堅礎卜日而興役焉君又為度其面勢之宜且節縮廩餐以助其費為堂五間其崇三尋有奇旁為兩齋以處游學者前為三門以謹啓閉肇役於是月丙戌至三月朔乃訖功焉像設有嚴繪飾惟煥郡之

長貳率諸生暨鄉之薦紳用少牢於堂以告成事焉君屬予書其事於石予惟道之大原出於天神聖繼之至孔子而後集羣聖之大成孟軻氏沒斯道之傳殆絕周子倡之程子和之至吾朱夫子而後紹孔氏之世嫡若黃若陳實羽翼夫子以共振斯道於衰絕之中者也夫功被一時惠洽一邑且尸而祝之夫子與二子有功斯道甚大而漳又夫子過化之地茲堂之建禮實宜之繼自今以往凡登茲堂者瞻梁山之崇秀俯清潭之泓渟

而致高山仰止之思興逝者如斯之歎蓋將有默契神
會於千載之下者乎君由進士歷刑部副郎遂擢今職
所至有冰蘄聲其在漳首新茲堂蓋欲風厲漳人向道
也繫之以詩以告志於道者詩曰

大哉斯道實原於天孰克任之惟聖若賢孟氏既殂吾
道日斲紫陽崛起興式纘厥緒迺擊其粹迺會其全若黃
若陳與有聞焉道學載明於今為烈質諸洙泗若合符
節清漳之濱梁山之下揭虔妥靈有堂有廡邦人具瞻

胡茲摧圯顯允周君載振而起惟堂翼翼惟門將將時
時薦裸牲脂醴芳嗟嗟斯道靡古靡今有志於斯盍明
厥心咨爾多士來游來歌匪察匪由爾心式詠

福寧節孝祠碑

古之忠臣孝子烈婦遭時不幸死於所天者代有其人
而出於一家者蓋鮮父子同死者古有之矣晉卞壺是
也夫婦同死者古有之矣宋趙昂發是也至若忠孝貞
節萃於一門若元福寧州尹王公者曠百世不數人焉

公諱巴延字伯敬濱之雷化人也起家宣使為祁陽令
調烏程以循良稱遷信州推官數辨冤獄所全活者甚
衆至正九年以大臣論薦擢朝列大夫福寧州尹至之
日黜奸吏誅元豪覈賦籍均徭役修學宮以教諸生建
禮殿以祀先聖福寧翕然稱治尋陞福建轉運副使會
盜起徐蔡蔓延及閩羣克相煽為變漸逼州境民留公
不得行公乃築壘門募民兵守之巖候望謹燧燧賊不
敢犯十二年秋賊陷寧德掠羅源勢益張冬十一月賊

與建寇合兵來寇公遣巡檢諤勒哲率兵出禦之而命千戶巖巴延布哈主簿陳文積守西門諤勒哲遇賊於古縣戰敗死之巖陳懼不敵開門先遁賊突入公聞之亟帥親兵迎戰連鬪數合不利遂被執賊帥坐州治召公詰之公掀髯歷階而升賊叱曰強盜猶作態耶公罵曰汝本販鹽盜縣官何負於汝而反顧謂我為盜耶賊怒叱之跪公兩手據地不為動賊益怒令撻之公詬曰吾為天子吏頭可斷身不可撻遂死於東門之外立而受

刃血出白如乳民哀之哭聲連巷明日賊執公仲子相
及其婦潘至相罵曰吾父已死吾豈苟生者何不速殺
我當為鬼以滅賊耳賊忿其言引出斬之潘有殊色賊
欲污之時潘產未彌月不可近乃閉之空室不食數日
而死寇退民斂公權厝於郭東之佛宇明年公長子楨
負公遺骸歸葬行臺御史余公闕以其事聞命立祠學
宮之右而以相與潘侑食焉元末祠燬於火成化壬辰
秋八月予行部至福寧耆民林慈等相率請復公祠予

因出西門觀公與賊戰處古木樛樛寒烟蒼然溪流澌澌有悲咽聲慨然太息想見公之為人乃以廢佛宇曰般若菴者為公祠命縣丞劉福介葺其弊陋加之巧填前為三門旁為兩廡繞以高墉塑公之像於中以相配之而置潘之像於東廡懼瀆也經始於是月甲戌落成於是歲冬十月辛未扁其祠曰節孝邦人請予書其事嗚呼公死於忠而使子死於孝婦死於貞眎卞壺趙昂發蓋似過之是宜祠也乃作歌以遺邦人使歲時歌以

祀焉其祠曰

靈宇沕穆兮烟冥冥簫鼓奏兮華鐙明神馭招搖兮何
許慘將降兮風泠泠公之來兮駕蒼螭佩吳鉤兮曳絳
旗俯故宫兮太息城郭是兮人民非松醪清兮海錯香
巫屢舞兮升公堂子來歆兮婦亦嘗公雖死兮嗟何傷
一世之短兮萬世之長龍山之顛兮長溪之湄候而去
兮忽而來睠我民兮降繁釐民之承祀兮終古無墮

新城縣重修廟學碑

新城為縣肇自宋紹興八年割南城之東境置縣治於
黎川鎮後四年乃置學於縣之巽隅由宋歷元以及皇
朝學宮敝而載新者屢矣弘治壬子冬十月金壇段侯
敏以進士出宰茲邑祇謁先聖周覽廟堂兩廡齋舍暨
門棟宇欹傾粉繪摧剝慨然欲新之顧歲方艱民方病
未暇有作越二年歲豐民樂政舉化流迺謀與縣丞黎
君某主簿祝君某及里居之賢者曰縣令民之師帥兼
治教之責焉今學宮頽圯若是殆無以養士而淑民盍

思所以新之乎丞簿皆曰是誠不可後也方圖興事邑
之富而好禮者胥告語曰吾侯此舉將以納吾民於禮
義之域吾曹衣食幸有餘盍助侯成之乎於是義民涂
汝謙建櫺星門砌泮池耆民朱時寧梵學前通衢俾行
者無滌污之患里民楊嵩塑先聖像改造龕座鄧廷璋
陶甃甃戟門暨兩廡前陰陽訓術涂汝校建鄉賢祠他
若講堂露臺從祀羣賢之像庖廩之房藏書之庫師儒
之廨諸生肄業之齋則侯與丞簿二君節縮冗費規畫

羨財以成之工善材良並手偕作始事於某年某月某日迄工於某年某月某日既成像設孔嚴規制宏麗他邑學宮未能或之先也侯卜日用少牢於文廟告成事焉教諭葉君鳳靈訓導陳君某范君某相謂曰昔魯侯作泮宮詩人頌焉文翁興學於蜀漢史美之今段侯修理學宮而寮佐協贊邑之耆彥亦丕應以相其成是不可無紀也乃具其事屬蒙陰丞涂達請予書之予素知段侯廉惠明果凡有興作民不勞而事集而達又予族

甥也乃詳書其事而系以詩曰

黎川之興學宮渠渠孰作新之惟邑大夫於惟大夫涖
茲百里永惟治本數學惟始迺咨迺詢迺計徒庸爰新
學宮以牖民衷自堂徂門自殿徂廡修廣質文罔浮于
度長衢如砥高門有伉泮水汪汪蘋藻其芳侯曰髦士
其聽予言修學匪艱懋學為艱士曰勗哉是訓是履敢
有怠荒貽侯之恥日峯蒼山黎水湯湯侯之德音百世
有光

贈太子少保彭惠安公祠堂碑

弘治八年正月十有三日刑部尚書彭公以疾卒於家
訃聞天子嗟悼特贈太子少保謚惠安命官諭祭者再
有司治墳塋以葬郡學舊有鄉賢祠大夫君子既為公
作主祀之其中而國子監丞林君大猷太僕寺丞吳君
世騰暨莆人之在朝者相謂曰惠安公一代之偉人宜
有專祠俾後學有所矜式迺與其里居之賢作祠堂若
干楹於所居之里中奉公像左右廂藏祭器遺書而以

書屬予紀其事予與公嘗同官且同志者也不敢辭公
諱韶字鳳儀世家莆田之涵口自少莊重好學稍長學
問該洽議論醇正一時學者皆推重之登天順丁丑進
士除刑部山西司主事丁內艱服闋改廣東司遷員外
郎大臣有自他途進者公上書言之坐是下制獄朝臣
多掇之者得釋久之遷郎中成化庚寅陞四川按察司
副使尋陞按察使又陞廣東布政使中官有家在廣東
者公言其恣橫坐是調貴州甲辰擢右副都御史巡撫

南畿召為大理寺卿未至坐論鎮守內外官貢獻非宜
道改右副都御史巡撫畿內兼理邊務今天子嗣位召
為刑部右侍郎屬浙西不靖奉勅往平之尋以本官兼
僉都御史整飭鹽法既還會朝廷以水災求言公請厚
根本減役錢正近侍慎官爵上皆嘉納改吏部左侍郎
壬子夏陞刑部尚書明年以疾連章乞罷遂得命致仕
初公為郎官論囚嘗求生之然元奸宿豪雖權貴交囑
不少貸及居外臺凡大吏貪縱者治之甚嚴而小官誤

犯者多所開釋巡撫南畿議者謂周文襄公後惟公可
繼之而律已之嚴出納之慎文襄不及也畿內多皇莊
其中官典守者往往怙勢病民聞公至憚其嚴肅皆自
戢其臨邊督耕戰嚴守備敵不敢窺塞垣為大司寇有
犯罪者參錯訊鞫多所平反嗚呼公以節行文章著聲
於時其行已為政務以古人自期待士君子識與不識
皆企慕之然亦不勝愴壬之媚嫉也故屢中以奇禍或
下獄或改官雅知公者猶以為好名賴列聖仁明卒保

全之致位六卿至其歿也贈謚之典祭墓之禮視當時大臣有過無不及焉嗟夫古今忠賢能得此者幾人哉公有二子長濬鄉貢進士次瀚嘉興縣丞皆先公卒一孫曰輔尚幼公之世系履歷之詳具載隧道之碑玄堂之銘予可畧也特紀其志節之大者以昭諸君子尊賢尚德之心又系以楚聲俾莆人歲時祭祀歌以招之其詞曰

吁嗟夫子兮端潔而好修日孜孜而忘倦兮惟道是求

上沂淵源於洙泗兮下絜槃獲於韓歐何厭世之太蚤
兮駕玄鷲而遠遊層城高寒兮曷足久留盍歸來兮徬
徬故丘壺山之巔兮有蘭有芷涵江之涯兮有魴有鯉
丹荔黃蕉兮甘且美素馨黃菊兮香旖旎夫子歸來兮
其樂無已撫汝孫曾兮慰我朋友騎箕尾而上下兮稅
駕於此采溪毛以薦芳兮酌甘露以當醴夫子不我顧
兮我淚如洗歸來歸來兮毋遠桑梓

范氏先塋碑

洛陽之萬安山下宋資政殿學士贈太師魏國范文正公之墳在焉其子將作監簿純佑丞相忠宣公純仁右丞恭獻公純禮龍圖閣學士純粹皆祔葬其間公葬距今三百餘禩塋域榛蕪樵牧不禁石麟僵卧宿草中而甍隸或墜其隧戶過者傷之成化乙未夏四月公之十二世孫家吳中者曰從規詣巡撫南圻都憲洛陽畢公陳其狀畢公移書巡撫河南都憲江浦張公屬修之公曰噫文正公一代偉人也凡所憩之樹尚當愛護而封

植之况體魄所藏乎亟下令正其塋域禁其樵牧且命
叅政孫君伯大叅議蔡君克存副使王君廷秀僉事馮
君景陽督守令治其墳因其幽窳甃以堅甃剗其輿草
樹以嘉木繚以峻垣表以綽楔又為祠三間以為公子
孫歲時拜掃之所於是公之體魄永有攸寧矣從規偕
其族兄希紳自吳走洛展省先塋用少牢於祠下以告
成事周覽壤樹愴然興感因相語曰先塋榛蕪殆百年
圯而復完繫二都憲暨藩臬諸君子是賴不可無識也

迺琢石置祠下請予書其事夫公之盛德駿烈史有傳
隧有碑名儒峻賢有論述奚取子不腆之辭哉然嘗論
之宋有天下三百年賢相眎漢唐為多而紫陽朱夫子
獨稱公為第一流人物何耶蓋昔之賢相或功業焯焯
而學術無聞焉或文章名世而相業不滿人意若公者
可謂兼之矣自漢以來諸儒未有知中庸之義者公當
洛學未興首勸橫渠張子讀中庸是蓋灼然知其為傳
道之書所學固已絕出千古矣至其推之於用也居諫

垣以謇諤著為郡守以惠政稱臨邊圉而威震於戎狄
晚登政府又欲堯舜其君民以成其先憂後樂之志彼
蕭曹房杜以及王寇諸公所建立有是哉宜朱夫子以
人物第一流許公也龍岡之阡以其子之賢至於今毋
敢壞况公之塋耶予既書其事并作迎享送神之歌以
遺范氏子孫俾拜掃者歌之以侑牲醪焉其辭曰

樊之里兮洛之許松楸櫛椽兮有封若斧靈之來兮駐
雲駟鼓坎坎兮巫屢舞靈宇沕穆兮風泠泠蕙香兮

松醪清覽故邱兮增歎菘菘多兮蘭杜零左忠宣兮右
恭獻父子一堂兮旣以宴願遲退兮毋遽旋愴予懷兮
淚如霰

右迎神

靈之旋兮杳何方飈馭翩翩兮雲路長袞衣爛兮赤舄
几几陟且降兮帝之傍天下之山兮白雲泉怨夜鶴兮
啼春鶻乘蒼虬兮駕玄鷲朝出遊兮暮來還靈之在天
兮儼若存錫多祉兮啓我後昆曾若玄兮永承祐春秋

拜掃兮奠蘋蘩

右送神

椒邱文集卷二十八